

*Wie de Jessus uf d Welt kumm is*

Grad in däre Zeit hat de Kaiser Auguscht die ganse Leit im Kaisereich angestellt, sie selle sich ufschreibe lasse. [2] Des war s äschte Mool, daß so was passiert is. Do war grad de Quirinius de Oweschte in Syrien. [3] Un dann sin aach die Leit all dort hiengang, wu ihre Freind friee gelebt han. Dort wollde se sich ufschreibe lasse.

[4] Aach de Josep hat sich uf de Weg gmacht un is losgang nou Bethlehem in Judäa. Vun dort hat de Kenich David gstammt, un weil de Josep sai Freind war, deveechet mußß ä aach dort hien. [5] Ä hat aach sei Braut Maria mitgenomm ghat, die is aa mitgang. Die war grad in Umstende. [6] Un grad wie se hien kum sin nou Bethlehem, war ihre Zeit dou, [7] un sie hat en Sohn griet. Des war des äschte Kind bei ähre, un sie hats in Windle ingewiggelt un hats in die Kormuschka ningeleet im Stall. Ken anre Platz han se nit gfun, grad wie den Stall.

[8] Dort uf dem Platz ware grad Härde, die han sich dort ufghald un han in de Nacht draus uf em Feld uf ihre Härde ufgepaß. [9] Uf eemol is en Engel vum Härrgott aankum, un s hat so scheen aangfang zu scheine. Un die Härde han uf eemol so Angscht griit. [10] Awwe de Engel hat gsaat: „Ihr bricht kee Angscht han! Ich kann eich so e Freed wezehle. Die ganse Leit in Israel werre sich fraaje. [11] Heit is in de Stadt vum David de Härr Chrischdus uf d Welt kumm, un dä wärd eich alminanne redde. [12] Kennt hiengehe un gugge: Ä lait in de Kormuschka un is in die Windle ingewiggelt. Dort wärde ihn aach glei sien.“ [13] Un uf eemol sin noch anre Engel hienkumm, un die han de Härrgott gelobt un han gsaat:

[14] „De Härrgott soll geährt gin im Himmel owwe, un sei Ruh soll uf die Äärd khumme, weil ä die Mensche gääre hat.“

[15] Un dann sin die Engel widde uf de Himmel gfloo. Un die Härde han sich dann bereedt un han gsaat: „Jetz gehe me mol nou Bethlehem un gugge, was dou passiert is un was me dou ghäärt han vum Härrgott.“

[16] Un nood sin se scharf lousgang, un wie se hien sin kumm, han se die Maria un de Josep gsiehn, un des Kind war in de Kormuschka gelej. [17] Wie se des gsiehn han, han se wezehlt, was de Engel vun dem Kind gsaat hat. [18] Die ganze Leit, wu gehäärt han, was die Härde gsaat han, han sich al so gewunnert. [19] Die Maria hat awwe alles fe sich behal un hat imme do draan gedenkt. [20] Die Härde sin awwe zurickgang zu ihrene Härde un han de Härrgott gelobt. Sie ware so froh iwwer des, was se gehäärt un gsiehn han. S war grad so gewesen, wie de Engel s wezehlt hat.

3 Freind: Verwandter; 4 devecchet: deswegen; 12 Kormuschka: Futterkrippe (russ.); wärde: werdet ihr; 14 gin: werden (Passiv).